

granulati, orbita interiore valde sinuati. Rostrum solum apicem mesosterni attingens, articulo primo caput haud superante. Antennae desunt. Pronotum latitudine postica circiter $\frac{1}{3}$ brevius, apice quam basi fere triplo angustius, lateribus subrectis, disco postico leviter convexiusculo, versus apicem levissime declivi. Hemielytra usque a basi pronoto paullo latiora, parallela, latitudine communi fere triplo longiora ($8\frac{1}{2}$ mm. longa, 3 mm. lata), cuneo corio parum magis quam duplo brevior; membrana angulo apicali interiore areolae majoris recta. Pedes longi, graciles; femoribus posticis crassitie maxima circiter octuplo longioribus, tarsis articulo primo secundo brevior, tertio secundo longior et gracilior.

2. *Megacoelum longicolle* n. sp.

Inferne pallide flavens, colore in roseum vel pallide sanguineum fortiter vergente, capite pronotoque sordide fuscescenti-ochraceis, scutello hemielytrisque nigro-piceis; antennis nigris (articuli ultimi desunt), articulo primo capite ab antico viso distincte longior et pronoto, strictura apicali excepta, vix brevior, setulis paucis brevissimis instructo; rostro pallido, coxas posticas distincte paullo superante; pronoto latitudine basali parum brevior, apice quam basi duplo angustior, disco a basi usque ad stricturam apicalem sensim aequaliter modice declivi et convexo, lateribus fortius, disco obsoletius transversim remote strigoso; dorso abdominis pallido, ventri concolore; femoribus flavente- et rufescenti-conspurcatis, tibiis pallide flaventibus, fusco-spinulosis, apice earum tarsisque obscure fuscis. ♂. Long. 7, lat. $2\frac{1}{4}$ mm.

Sierra Leona, D. Afzelius.

Species statura pronoti mox distinguenda. Caput fortiter nutans, basi pronoti circiter $\frac{3}{7}$ angustius, ab antico visum latitudini basali cum oculis longitudine subaequale, a latere visum altitudine basali saltem $\frac{1}{3}$ brevius, vertex (♂) oculo latitudine subaequali, sulco longitudinali distincto instructo, fronte subverticali, utrinque oblique strigata, clypeo parum prominente, basi a fronte sat obsolete discreto, angulo faciali subacuto, genis humilibus, gula distincte, sed sat leviter obliqua. Oculi laeves, nigro-fusci, orbita interiore maris fortiter sinuati.